



944



76

DECANUS  
COLLEGII PHILOSOPHICI  
IN  
ACADEMIA LIPSIENSI  
Professorum

*sue Facultatis*  
Lectiones Publicas  
significat.

---

PP. Dominicâ Rogationum  
d. 8. Maii Anno M DCLXX.

17.

**C**um ante hos quinque annos Facultatis nostræ Professorum lectiones indicerentur, disputatum est aliquid adversus Edmundi Dickinsoni Oratiunculam pro Philosophia liberanda, quæ Delphis ejus Phœnicizantibus Oxoniæ A. 1655. vulgatis adjuncta legitur. Nunc eadem nos invitat occasio, ut aliquid opponamus Tractui Theologico-politico similis argumenti, Hamburgi, si titulo credimus, excuso, nec ita pridem ad nos, (museum enim opus est, hoc ipso videlicet anno editum,) allatum, quo nescio quis lucifuga scriptor ostendere conatur, libertatem philosophandi non tantum salva Pietate, & Reip. pace posse concedi, sed eandem, nisi cum pace Reip. ipsaq; Pietate tolli non posse. Par scopus utriq; fuit autori, ut opinandi, novisq; orbem dogmatibus inundandi maximam saderent licentiam. Hoc interest, quod Pandoram suam Dickinsonus quidem in Philosophorum Scholas tantum, alter ille potius in Sacra Theologorum introducere laboravit. Qvanquam enim & hic, si titulum inspicias, non aliam libertatem profitetur, quam philosophandi: res ipsa tamen loquitur, omnium religionum infinitam licentiam hoc eum nomine occuluisse, sive quod erubesceret infame, portentum in ipsa statim libri facie denudare; sive quod sui rationes delirii sic instituisset, ut quas nos vocamus controversias fidei, ipse non ad fidem, sed ad philosophiam referret. Nimurum fidei vocabulum ad solam obedientiam, (h. e. si eventum rimeris, ad externam in humano foro honeste vivendi disciplinam,) arctavit; ex adverso philosophiae laciniam ad omnem veritatem, (etiam sine qua placere DEO nos posse negant orthodoxi,) extendit a). Eâ re factum ut illius philosophicæ libertatis exemplum laudaret in urbe Amstelodamensi, in quâ omnes, inquit b), cujuscunq; nationis & sectæ homines summâ cum concordia vivunt, -- & nulla omnino tam odiosa secta est, cuius sectarii, (modo neminem laedant, & suum unicuiq; tribuant, honesteq; vivant,) publicâ Magistratum autoritate & presidio non protegantur. Scire sic, opinor, licet, quænam illa sit Resp. quam in prefatione c) prædicans, rarae quæ felicitati imputans, quod in eâ sibi vivere contigisset, eam esse ait, ubi unicuiq; judicandi libertas integra concedatur.

In

a) Cap. XIV. cum p. 162, asservisset, fidem non tam requirere vera, quam pia dogmata, postea p. 165. 166. hæc protert: Philosophia scopus nihil est prater veritatem; Fidei autem -- nihil prater obedientiam & pietatem. -- Fides igitur summam unicuique libertatem ad philosophandum concedit, ut quicquid vellet, de rebus quibuscumque sine scelere sentire possit.

b) c. ult. p. 232.

c) \* 31

In hac tamen tantâ felicitate tam infelix ipse fuit, ut nominis eum sui puduerit: nempe hominem religionis illius, quæ sectas omnes & natas in huc usq; diem & nasci possibles, dummodo sit in generalissimis qvibusdam, iisq; paucis capitibus d) consensio, & qvæ probans patentem Atheismo portam aperit. Naturalismum appellare solemus: cuius Rudimenta vel Institutiones, bonam partem è pestilentissimis duorum nostri seculi Novatorum principiis consutas & interpolatas qvi librum illum nominet, fortasse rem ipsam dicat. Cùm enim totius operis duas partes e) animo concepisset Autor, qvarum altera Libertinismum illum veræ fidei seu religioni, altera paci Reip. consentaneum esse defenderet: prior Theologiam Edoardi Baronis Herberti, posterior Politicam Thomæ Hobbesii sapit. Neq; nihil Præadamitæ Peyrero debere videtur f). In eo autem propriam sibi patitur insaniam, qvòd ne DEO qvidem Prophetis loquenti plura vult infallibiliter credi oportere, (horrescit hæc scribens calamus,) qvàm qvæ de substantiâ sint revelationis ac fine g), nempe qvòd in cæteris non tam veritati se DEUS, qvàm opinionibus Prophetarum, qvæ falsæ non raro fuerint, accommodaverit b). Verum de hæc profanitate proferre plura non est hujus instituti, præsertim

) 2

cùm

d) Quinque articuli Edoardi Herberti, Naturalistarum hujus ævi Patriarchæ, noti sunt ē cap. ejus I. de Relig. Gentil. p. 2. & ē p. 268. seqq. de Veritate. Noster vero Anonymus fundamentalia fidei catholicae dogmata nulla præter hæc agnoscit c. XIV. p. 163. 1. Deum existere. 2. eum esse unicum. 3. omnia ipsi patere. 4. ipsum in omnia supremum habere ius. 5. cultum Dei ejusque obedientiam in solâ justitia & charitate, siue amore erga proximum consistere. 6. omnes, qui hæc vivendi ratione Deo obediunt, salvos tantum esse; reliquos autem, qui sub imperio voluptatum vivunt, perditos. 7. Deum pœnitentibus peccata condonare. Postea sic differit: Ceterum quid Deus sit, an scil. sit ignis, spiritus, lux, cogitatio &c. id nihil ad fidem: -- nihil etiam ad fidem, si quis credit, quod Deus - res dirigit ex libertate, vel necessitate naturæ; -- quod homo ex arbitrio libertate, vel ex necessitate divini decreti DEO obediat. --

e) Insinuat has partes titulus quodammodo, dum Pietatem à Reip. pace distinguat. Clarius eam indicant verba præfationis \*\* i. Postquam his libertatem &c. inchoatur autem pars altera à c. XVI.

f) Intelliges, ubi quæ Anonymus noster c. II. p. 22. 23. de Sole temporibus Josuæ stante, de umbrâ in horologio Achas retrogradâ, de Noachi diluvio differit, compones cum Systemate Præadamitæ Theologico lib. IV. c. 4. 5. & 7.

g) ea verò quam arctis limitibus includat, vel hoc lemma docebit cap. XIII. Ostenditur, scripturam non nisi simplicissima docere, nec aliud prater obedientiam intendere, nec de Divinâ naturâ aliud dicere, quam quod homines certâ vivendi ratione imitari possunt. b) cap. II. p. 28.

Satis superque: ubi postea Kainum quoque Prophetis annumerat.

cum honoratissimum hactenus Collegam nostrum FRID. RAP-<sup>s</sup>  
POLTUM, summæ Virum eruditionis ac sapientiæ cognoverimus  
in eonunc esse , ut Naturalismi totius eversionem argumentum  
faciat habendæ propediem orationis, qva Theologicam Professio-  
nem, ( qvod felix faustumq; sit ! ) auspicetur. Id agebamus tantum,  
ut Anonymi ratiunculas, qvæ sepositâ etiam hypothesi naturalistica  
insanam qvidvis in qvocunq; disciplinæ genere novandi licentiam  
colorant, vocaremus ad examen. Eas ipse servavit vigesimo sui Tra-  
ctatus, h. e. ultimo capiti, qvo, ut habet lemma, ostenditur, in liberâ Rep.  
unicuiq;<sup>s</sup> sentire qvæ velit, & qvæ sentiat, dicere licere.

Observamus initiō, tametsi libertatem istiusmodi non tām Re-  
gis aut optimatum statui , qvām Democratico regimini, ( hoc enim  
ipsi est Rep. libera, ) convenire innuit i ): ( nec diffitear , populari  
formæ cum illâ Naturalismi Babele maximam intercedere sympa-  
thiam ; ) argumenta ejusnam præcipua tām esse generalia, ut in  
qvamlibet Reip. speciem, si qvid valent, & qvæ valeant : illud in primis, à  
qvo caput orditur, de impossibili. Nam si qvid impossibile est, non  
minùs in eo ludet operam Rex Monarcha, qvām Populus liber.

Jam in fine capitinis ipse qvidem in sex puncta, qvicq; hīc dixe-  
rat, colligit : sed in stituto nostro, qvibus à spacio chartæ lex præscribi-  
tur, forsan & analysi, cuius ipse non exquisitissimus fuit artifex, me-  
liùs consuletur, si rem omnem ad tria revocemus. Sic enim est :  
primò impossibile putat, libertatem isthanc hominib; adimere<sup>k</sup> ); dein-  
de qvosdam ipsi tamen limites ponit l ); tandem objectioni, qvæ liber-  
tatem ex incommodis reprehendit, satisfacere conatur<sup>m</sup>). In sin-  
gulis ea tantum, qvæ videbuntur eminere, perstringemus.

De primo hæc ejus verba excerpto : *Nemo jus suum naturale,*  
*sive facultatem suam liberè ratiocinandi -- in alium transferre, neq; ad id*  
*cogi potest. Hinc ergò fit, -- ut summa majestas injuriam subditis face-*  
*re -- videatur, qvando unicuiq; præscribere vult, qvid tanquam verum am-*  
*plete, & tanquam falsum rejicere -- debeat ; hac enim uniuscujusq; juris sunt,*  
*quo nemo, et si velit, cedere potest -- n ]. -- Si itaq;<sup>s</sup> - uniusquisq; maximo*  
*naturæ jure dominus suarum cogitationum est , sequitur, in Rep. nun-*  
*quam nisi admodum infelici successu tentari posse, ut homines qvævis diver-*  
*sa & contraria sentientes, nihil tamen nisi ex præscripto summarum potesta-*  
*tum*

i) vide p. 225. in fin. & conf. p. 231. item præfat. \* 3.

k) ab initio capitinis p. 225.

l) p. 226. S. Verum enim vero nequaquam.

m) p. 229. § Evidem sator. n) p. 225.

tum loquuntur: nam nec peritissimi, ne dicam plebem, tacere sciunt o). Hic assentior, imperio civili nihil esse potestatis in cogitatūs internos qvā tales, qvanqvam hujus rei causam non satis explanatē tradit. Anonymus. Sed cave cum ipso p) ab his internis actibus ad illos loqvendi, aut signis aliis cogitata mentis edendi, externos argu menteris. Nam hos id ipsum, qvod externi simul & liberi sunt, obnoxios imperio facit. Imò verò, inquit nōster, non sunt liberi. Qvis enim tacere potest? Sanè tui similes, Anonyme, tacere non possunt. Nam si potuisses, non qvæsivisses typographum. Sed vide, amabo, in hāc ipsā impotentia tuā vel scintillam libertatis. Nam bellissimè potuisti nomen tuum obtice scere. Hoc autem scire te velim, posse leges etiam impotentibus ponī, si hanc impotentiam illis pravi mores induerint. Multi non possunt furaces manus cohibere: nec horum tamen contemplatione te credo furandi licentiam introductam cupere.

Progredior ad membrum alterum. In quo rectè qvidem hoc pronuncias q), (pergam enim te alloqvi,) perniciōsissimum esse, libertatem omnino, h.e. nullis circumscriptam terminis, concedere. Sed termini tui parum sanæ Politicæ fundamentis, qvæ excutere hīc non licet, superstructi, partim inepti sunt, si modum reputo, partim, si objectum, laxi nimis. Ad modum hāc pertinent, cùm ais r), posse aliquem contrā summarum potestatum decretum omnino sentire, & judicare, & consequenter etiam dicere s), modo simpliciter tantum dicat vel doceat t), & solā ratione, non autem dolo, irā, odio, nec animo aliquid in Remp. ex autoritate sui decreti introducendi defendat. Gravius eum peccare fateor, qvi dum recepta suæ Civitatis decreta convellit, affectus malevolentiae miscet: Sed səpè magis nocet speciosis rationum coloribus picta, qvām turbulenta passionum fluctibus oratio. Rectius opinor distinxisses inter secreta pectoris, qvæ se privatim exonerant in sinum amici taciturni, & qvæ diffunduntur per plateas publicas. Neqve noxam hīc effugiet illa cautio, si quis simul suam sententiam iudicio summæ potestatis submittat u), qvā in hoc opere te qvoqve usum video x). Nam qvi palam disseminat venena, ut ea se maximè dicat Medicorum censuræ subjicere, non ideo minorem edet stragem.

Ante-

o) p. 226. p) facit hoc non tantum hīc, sed & membro sequente, ubi quare litteram l. q) p. 226. r) p. 227. f) respice adlit. p.

i) contrā decretum summarum potestatum agere vetat scriptor in præcedentibus; docere hīc non vetat. Quasi docere non sit agere. u) p. 227. x) in fine totius libri,

Anteqvam adveniat Medicus, jam turba cadaverum erit: imò genus hoc veneni tantò babitur avidius, qvantò severius vetatur. Ad obiectum ubi pervenisti, opiniones in Rep. seditiosas, eoq; minime ferendas, eas tantùm judicas, quæ simul ac ponuntur, pactum, quo unusquisque jure agendi ex proprio suo arbitrio cessit, tollitur: e. g. si quis sentiat, summam potestatem sui juris non esse, vel neminem promissis stare debere: cæteras seditiosas esse inficiaris, nisi forte in Rep. aliquâ ratiōne corruptâ y), h.e. ut è seqventibus intelligo, quæ non unicuiq; eandem philosophandi libertatem concedat, quam fides (Naturalistica tua) unicuiq; concedit z]. Sic ergò per te nulla lex vetabit, qvò minus furiosissimus quisq; virus in religione suum evomat publicè: quale his & ipsis nundinis de statu loco & vitâ animarum nescio cujus anonymi disquisitoris a) circumvolavit. Atqvi seditiosas opiniones illas qvoq; meritò censemus esse, quæ consentientes alioqvi circâ fidem rectè se habentem animos, cum periculo salutis æternæ discindere possunt in factio-nes. Ne illa qvidem insuper habenda est seditio, quâ tot ac tam diversæ philosophantium viæ discipulorum ingenia conturbant, dum, ut ait Comenius b), non in commune ædificamus, sed in partes dilapsi sua tantùm quisque communire, aliena cuniculis qvibuscunq; subrure satagit.

Tu verò, ut ad tertium veniamus, hæc incommoda parvipen-dis, jamq; pensari vis ea ingenti commodo: nam hæc libertas, ais, apprimè necessaria est ad scientias & artes promovendum c), quæ tamen libertas longè dissidet ab illâ nobis invisâ d); jam oppositæ servitutis incommoda enumeras: seqvi enim adulacionem & perfidiam, ut homines quotidiè aliud sentiant, aliud loquantur e); seqvi schismata in Ecclesiâ f); seqvi virorum honestorum, qui diversa sentiunt, & simulare nesciunt, exilia & neces g); jam Amstelodami urbis exemplo confici putas, quæ ex immani illâ tuâ libertate oriantur in commoda, solâ summae potestatis autoritate

y) p. 228. z) p. 229. a) impressa Disquisitio est in 12. absque loci temporisqué mentione. Castigavit jam eam obiter Erasmus Francisci in præf. seines Geschichtspiegels.

b) Diatyp. Pansoph. p. 58. quem & vide pag. 36. 56. meretur enim omnino contrâ Libertinos illos legi: quanquam despero fore, ut aliquando per universum orbem illa, quam svaviter somniat, Pansophia regnet, quâ sublati dissidiis (p. 32.) nemo se in Philosophiâ dicet Platonicum vel Aristotelicum, in Theologîa Lutheranum vel Calvinianum, vel Pontificium, omnes autem Philosophos & Christianos (p. 60.)

c) p. 229. d) Liberum esse nos etiam volumus nobilioribus ingeniis, inventa nova nec periculosa eruditorum judiciis modestè exponere; non liberum Bam-balioni cuivis, nugas suas Scholis obtrudere. e) p. 229. f) p. 230. g) ibid.

tate vitari posse h). At enim verò temperata servitus nostra neminem cogit animi sensa dissimulare, tantum vetat publicè receptis per consumaciam obniti i). Schismatum verò longè major metus est ab illâ Naturalismi licentia, qvam ubi lingvam omnium unam & cor unum esse leges jubent. De exiliis & necibus qvæ dicis, ad ea respondeant Pontificii: nos illa non feriunt, qvi negamus religionis ergò vim esse, cuiq; nisi seditionis aut blasphemiae flagitium accedit, inferendam. Apud Amstelodamenses civili pace seetas omnes cum hominibus frui audio, pace spirituali cum DEO frui non audio, neq; si à te audiam, credo. Lauda interim tu in urbe unâ tot seetas. Ego in Academiâ nostrâ laudo tot Professorum ut religionem unam, sic unam studia discentium promovendi cupiditatem. Cui hæc ipsorum manuæ testimonium dicent.

h) p. 231. 232. i) Anonymus ipse p. 227. civem suum sapè contrà id quod bonum judicat, & palam sentit, agere debere pronunciat,

MANE HORA VI. D. JOHANNES ITTIGIUS, Phys. Prof. Publ. Acad. p. t. Rector, Synopsin Physicam, qvam superiore anno auspicatus est, nondum verò propter negotia publica ad finem perduxit, qvanticum muneris gravitas permittet, continuabit.

HORA VIII. L. VALENTINUS ALBERTI, Dialect. Philipp. & Metaph. P. P. ex Logica diebus Lunæ & Martis, Jovis autem & Veneris ex Metaphysica, Canones non ubivis obvios nec ab aliis satis expositos feligere, eorumq; 1. Autores, 2. fontem in præceptis, & 3. exempla tradere, 4. antithesen & 5. abusum refellere perget, observans scilicet, hunc laborem gratum non minùs ac utilissimum esse Studioſæ Juventutis.

HORA IX. M. JOHANN RÜHN / Prof. Math. continuabit & hæc æstate absolvet Doctrinam Astrologicam, cui calculum Eclipſium subjunget, præmissis Elementis Arithmeticis, logisticis præsertim, ad motuum cœlestium supputationes necessariis: Operæ privatae erunt occupatæ circa Operationes geodæticas, experimenta optica & observationes astronomicas.

HORA XI. M. JOACHIMUS FELLERUS, Poët. Prof. P. lectiones suas propediem, Jesu Fortunante, auspicaturus, vestigiis Plur. Rev. & Ampliss. Dn. D. Frid. Rappolti, haec tenus Poët. nunc Theol. P. P. celeberrimi, pro virili insistet, qvin & ipse Horatium ad Philosophiam perget exigere, cumq; jam duo Carminum Horatianorum libri ab Optimo Antecessore hoc genere commentandi sint, absoluti, deinceps tertium qvōq; & quartum pertractabit eodem mo-

do, adeoqve, qvæ aut Peripaton Aristotelis, aut Stoicorum porticum, aut hortum Epicuri redolebunt in illis, ( Eclecticum enim Flaccum fuisse constat,) ea certis observationibus inclusa exhibebit. Et hæc qvidem dictabit ad calatum. Cætera verò, qvæ ad Humanitatem spectabunt, monebit obiter, & quasi per discursum.

A MERIDIE HORA I. M. JAC. THOMASIUS, Eloq. Prof. P. & h. t. Collegii Philosophici Decanus perget in dictandis illustrandisque Thematibus Oratoriis, initium facturus à Themate de Raptu Sabinarum.

HORA II. M. OTTO MENCKENIUS, Phil. Pract. Prof. P. Hugonis Grotii de jure belli ac pacis librorum succinctam per aphorismos Politicos analysin, ipsumqve adeò operis istius nucleum publicis prælectionibus exhibebit. Intra privatos verò parietes Grotiani operis textum fusius interpretabitur, ventilandumqve privatis disputationibus subjicit. Universam item Philosophiam Practicam secundum ductum Thomasianarum tabellarum iis tradet, qui ex fontibus Aristotelicis solidiorem hujus disciplinæ notitiam cupiunt haurire. Eoqve absoluto vel Svetonii Augustum, eā, qvā hactenus Cæsarem, methodo, vel Taciti Annales πραγμάτειας πολιτικῆς studio, Deo vires indulgente, explicabit.

HORA III. CHRISTIAN FRIDERICUS Frankenstein / L.L. & Histor. Prof. Publ. perget in explicandâ Historiâ Universalî juxta Ideam Bunonis. Privatim Geographiam tradet, itemqve Notitiam Imperii Bœcleri elucidabit.

HORA EAD. L. JOHANNES OLEARIUS, Græcæ Lingvæ Professor publicè qvæ supersunt in MATTHÆO capita tredecim intermedia à XIII. ad XXV. cum fine anni finire studebit, reliquum, temporis ad nundinas usqve vernales datus enarrationi Historiæ passionis ac resurrectionis Dominicæ à LUCA descriptæ; privatim textus evangelicos festivales ac deinde pericopas epistolares succinctis aphorismis Philologiæ Græcæ Sacræ in servientibus illustrabit. THEOPHRASTI quoqve characteres ethicos librum planè aureum explanando studiosæ juventuti familiarem reddet.

HORA IV. M. ANTON. GUNTH. HESHUSIUS, Aristotelici Organi Prof. Publ, enucleatis huc usqve libris, qui formalem Syllogismi Analysis in Organo spectant, eos quo fieri poterit compendio explicabit imposterum, qui Analysis docent materialem, totiusqve Logicæ & objectum continent, & finem principalem.

---

LITERIS COLERIANIS.

DD A 6358




3

5b.

1017

Rutho ✓

5 ♦ R



DECANUS  
COLLEGII PHILOSOPHICI  
IN  
ACADEMIA LIPSIEN SI  
Professorum

*sue Facultatis  
Lectiones Publicas  
significat.*

PP. Dominicā Rogationum  
d. 8. Maii Anno M DCLXX.

Farbkarte #13

